

INUIT ATAQATIGIIT

Inatsisartuni



UPA19/128
Mimi Karlsen

Nunatsinni inuit innarluutillit ilinniartitaanikkut suliffeqarnikkullu atugaannik misissuinerup kingusinnerpaamik UPA 2020-mi saqqummiuneqarnissaanik Inatsisartut aalajangiiffigisassaattut siunnersuut. Iliniarfiusinnaasutut suliffiusinnaasutullu piukkunnaatillit qanoq tapersorneqartignerannik aammalu inunnit pineqartunit inuiaqatigiinnillu pisariaqarneratut atorneqartignerannik erseqqinnerusumik qulaajaanermik misissuineq imaqassaaq, soorluttaaq misissuineq inuit innarluutillit ilinniartitaanerannut suliffeqarneranullu tunngasumik siunissami ilisimasaqalernissamut qulakkeerinnittumik aalajangiisoqaranik malitseqartinneqassasoq.

(Inatsisartunut ilaasortaq, Aqqa Samuelsen, Inuit Ataqatigiit)

Inuk kinaluunniit piginnaasannguani atorlugit inoqatiminut iluaquataajumasapoq. Innarluutillit piginnaasaqartaramik taakku atorlugit iluaquataalaarnissartik, atorfissaqartinneqarnertik upternarsineqaraangat naleqartutut aamma misigisarput. Innarluutillit inuttulli allatut misigissuseqaramik minnerpaannguamil- luunniit atorfissaqartineqarnertik tulluussutigalugulu inuttut naleqartutut misigiffigisarpaat. Taamaammat uagut inuiaqatigiinni innarluutillit piginnaaffeqarfingisaanni ilinniarfinnik suliffeqaffinnillu peqassalluta pisussaaffigaarput.

Inuit Ataqatigiit siunnersuuteqartoq Aqqa Samulesen qutsaviugiuamavaat innarluutillit eqqummaariffagalugit neriuuteqalersillugillu inuit innarluutillit ilinniartitaanikkut suliffeqarnikkullu atugaannik misissuinissamik Naalakkersuisunut saqqummiusseqqusimmat. Isumaqtigiilluinnarpalparput inuit innarluutillit suliffeqarnerat ilinniagaqarneralluunniit kisitsisaatiginnginnatsigu pisariaqartikkiput. Misissuineq pisariaqarluinnarpoq, taannami aallaavigalugu inatsisartuni

suut pisariaqartut aallartinnissaannut pilersinnissaannullu takussutissiippat atorluarsinnaagatsigu.

Assersuutigiinnarlugu meeqqat atuarfianni meeqqat innarluutillit immikkut aningaasarpassuit atorlugit ukiut 10-it atuartittarpagut, immikkut klasseler-lugit, marlunnik ilinniartitsisulerlugit, - qujanartumik. Taakkuli meeqqat atuar-fiat naammassippassuk periarfissaqartinngilagut ilinniarfissaannik, suliffeqaler-nissaannik, immaqalu arlaqarput siusinaarlutik pensioneqaannartunngortartut, uffa aamma pisinnaasaqarlutillu ulluinnarni inooqataanissaminnut iluaqtigisin-naagaluaraat.

Inersimasorpassuuppullu aamma innarluutilinnik, sumili sulinersut naluagut. Nunatsinni assaat sulisinnaasut tamaasa atorfissaqartippagut, taamaammat suliffiit immikkut illersukkat, sivikinnerusut allatulluunniit naleqqussakkat pi-sariaqartippagut. Tamaammat Aqqa Samuelsenip siunnersuutaas taperserpar-put.

Naalakkersuisulli itigartitsipput. Namminerooq taama suliaqaramik. Tassami-gooq namminneq suliassamik piareersaallutik aallartissimapput, kommunit in-uit innarluutillit pillugit naatsorsuineri taavalu inuit innarluutillit ilinniarti-taanerannut suliffeqarnerannullu naatsorsuinerit ataatsimoortilernissaat si-unertaralugu. Tamanna qujarunnarluinnarpoq, tassami nammineq oqarnerattut inuit ikorsiissutinik pisartut assigiinngitsorpassummat.

Siunnersuuteqartulli siunnersuutaas naalakkersuisut suliaminnut ilanngussi-naavaat. Taamaammat itigartiinnarnagu Inuit Ataqatigiinniit allanguutissamik siunnersuuteqarpugut ima:

Naalakkersuisut suliassamik aallartitaminni, kommunit inuit in-narluutillit pillugit naatsorsuineri inuillu innarluutillit ilinniarti-taanerannut suliffeqarnerannullu naatsorsuinerit ataatsimoortilernis-saat siunertaralugu aammalu suliaminni ilinniarfiusinnaasutut suliffiusinnaasutullu piukkunnaatillit qanoq tapersorsorneqartigineran-nik aammalu inunnit pineqartunit inuiaqatigiinnillu pisariaqarneratut atorneqartiginerannik erseqqinnerusumik qulaajaanermik misissuineq imaqartissagaattaaq.

Taama allannguutissamik siunnersuuteqarluta siunnersuut ataatsimiitsitaliamut susassaqartumut ingerlateqqikumavarput.